

培

蔭

軒

詩

集

培蔭軒詩集目錄

卷一

古今體詩一百六十三首

卷二

古今體詩一百六十一首

卷三

古今體詩一百七十二首

卷四

古今體詩一百六十八首

培蔭軒詩集卷一

光山 胡季堂

雲坡

古今體詩一百六十三首

春山偶行

春來百卉爭紅紫隨處高峯鳥亂啼爲愛山容閒步履小橋東
過小橋西

閒來隨意步林邱雲滿深山響碧流最是多情魂斷處夕陽欲
盡暮煙浮

九月登冠石山

三秋序至壯懷寬緩步登臨意自歡獅子獨踞當面嘯

山前有獅子峯

螺峯九峒入雲寒

山左有九峯尖

平崗圍繞形如帶怪石高盤勢若冠

滿目煙光凝暮紫出山猶作在山看

幾步雲梯幾步斜尋真特地到山家逕穿鳳尾遙遙曲身傍龍

鱗密密遮石鼓有聲何用樂

山中有大石擊之如鼓

清泉無滓可烹茶

山頂

有泉供一廟之飲

與僧共話無生論比作蓬萊差未差

游濮公仙洞

洞中仙客今何在洞外惟存第一峯

山下有碑鐫東南第一峯五字

數壘白雲

來旦暮一灣綠水自西東
山風景千年遠息國煙霞萬古融

縱目登臨頻眺望江黃海嶽落胸中

壬申除夕和周息園原韻

長安此日好韶光
留得高賢客滿牀
是歲署內親友甚多故云
爆竹聲聲除舊臘
寒梅點點吐新香
鑪熏柏子添佳興
盤獻椒花解悶腸
詩有賡歌尊有酒
他鄉安處卽家鄉

元旦早朝詩四首

紫陌看初曙

君王已視朝
觴開浮柏葉
樂作聽簫韶
拜舞羣僚肅
班儀綵仗饒
香煙凝瑞宇
常伴慶雲飄

金闕龍光耀

堯階集鳳鸞
銀河初瀉影
玉漏未催殘
試論登仙幻
何如奪席歡

天顏真咫尺臨照此心丹

正值朝元日千官列

廟堂衣冠新萬國儀仗耀三光鳳閣連雲漢龍樓接建章協和原有象何必更懸羊

濟濟英才列隨班趨六曹殘星流殿閣曉露溼旌旄玉宇卿雲麗金鑪瑞氣高椒花爭獻頌

敕賜醉春醪

題歲寒三友圖

梅花修竹與孤松勁節清標一樣同我願從君結四友任教桃李鬧春風

宮槐

亭亭老幹列宮牆
葱蒨盈園慶澤長
最是綠陰垂地密
偏饒翠影繞庭芳
屯雲已識三台貴
蔽日還生九夏涼
看爾扶疎依帝座
滿枝花露鳳池香

夏日訪唐瑞昭於德勝門外因納涼柳陰下

西山爽氣挹京華
郊北尋君路不賒
疎柳數株風細細
披襟直入五雲車

題汪繡林杖策入燕圖

西風匹馬上長安
祖道人人引領看
傑句滿篇詞吐玉
楓林一路葉生丹
欣從冀北欽風雅
好向淮南識鳳鸞
行見

九重知姓字金章飛出五雲端

題畫松

獨立乾坤貫歲寒清標千尺舞青鸞百川毓秀參天出五岳鍾
靈繞地蟠天矯龍姿驚宇宙精奇鶴骨耀琅玕一從妙筆傳貞
操贏得人人仰面看

贈潘南田

南田名是稷江南常熟人善乾皴法爲
十二名家之一嗜酒醉後潑墨淋漓頗自矜惜

欽定

久從洛下欽風雅近向長安識異材座上倒傾三百盞筆端飛
動一聲雷雲中矯鶴清奇骨宇內雕龍錦繡才任爾世情多變
態總將真率對人開

題畫梅

幾枝墨妙見精神一幅幽香欲襲人玉蕊含煙輕破臘冰姿帶
雪暗傳春清奇合共松筠伴淡遠偏宜水月隣獨向歲寒開素
面滿懷高致不沾塵

題梅竹

疎篁爲伴玉爲神帶雪含煙氣味真不共繁華誇豔麗歲寒清
況白飭飭

寄唐瑞昭時効力金陵

十年交契百年心真味相投氣誼深念我書憑鴻作寄思君夢
藉蝶相尋江南漫詠三山句冀北空彈一曲琴兩地同舟各努
力好將經濟繼華簪

贈范堃昀

堃昀名榕江南丹陽人善丹青尤精鐵筆

江左風流士相逢識異材
翔鸞天外至舞鶴月中迴
詩思清如雪文心淡若梅
高談傾蓋日連壁重金臺

荅范堃昀留別原韻

瑤臺鶴去苦追尋腸斷難
廣別後吟有夢不成真好
夢無心相處始交心芝蘭
氣誼千秋迴風月情懷兩
地深流水此衷同不盡高
山終古屬知音

荅黃逸雲所贈原韻

江左聲名重燕山景望隆
高風追謝傳逸興邁陶公
捉月騰銀漢凌雲跨彩虹
文成破浪手才具濟川功
討論三餘足研求萬

理融人如金渾樸心似玉玲瓏養性華陽洞修翎桂子宮未能
欣把臂先已仰光風

春雨

陰雲連四野長日雨潛潛隴麥滋銀浪林花洗玉顏燕翻梁上
下鷗傍水飛還農事今年好高歌意自閒

荅范楚昀見贈原韻

雲邊來錦句飯我水晶葱雅唱名人筆雄才國士風登高空大
地把酒渺微躬一幅離羣意書憑楮國公

佳節重陽近東離氣鬱葱芙蓉擎玉露蘆荻漾金風大道直如
髮斯文備在躬相逢重話舊尊酒對陶公

秋晚懷范大埜韵

天高雲靜月玲瓏
塞雁南來點碧空
楓葉染丹金掌露
芙蓉吹老鯉魚風
經年對面言難盡
纔不相逢耳便聾
秋色那堪回首望
馬蹄無處覓花驄

題畫松

鐵幹摩挲撐碧漢
莫將尺幅渺風標
凌雲貫作虬龍舞
不共尋常草木凋

冬日懷馮介亭和范埜韵

寒威正冽霜風急
吹破楊枝萬縷青
馬首莫教回首望
恐牽離緒夜長醒

蓬萊仙子過崑崙
腳踏行雲一片青
傳語衝寒真妙訣
但宜微醉不宜醒

匹馬西行關外路
眼前松柏色青青
山邨茅店鷄鳴後
不識離人醒未醒

曉夜披星行塞外
寒窗惟有一鐙青
情腸兩地千回結
不是君醒我未醒

銷魂獨對寒山月
百盞誰分眼上青
蝴蝶尋君邀我共
酒醒還有夢難醒

極目寒風生別恨
霜花刺眼竹偏青
寸心不爲關山隔
尊酒何時共醉醒

冬日送陳肅庵比部省親歸里

肅庵廣東雷州人祖諱璫任福建巡撫贈禮部尚書

諡清端

宗伯家聲傳奕葉蘭孫今又重秋曹清如朗月懸銀漢和似春風拂玉桃三尺劒光冲斗極一鞭寒色落亭皋束裝惟有斑衣在誰不欽心仰素操

省親今日出燕京辭別新盟與舊盟豈是浮雲看富貴祇緣孺慕薄功名黔婁心事千秋壯江革情懷萬里輕風雪幾番歸故里玉梅花下祝長生

旅館頻驚鄉國夢陳情萬里侍慈闈分襟無計畱還住執手何能勸莫歸月照東洋清夜冷

陳君世居雷州府之東洋

風橫庾嶺白雲飛看

君今日烏私切不禁潛潛淚滿衣

余少失怙恃

金石交情分兩地傷心魂夢也歛歛黃昏獨對寒山月清夜誰

同待漏車

余與陳君同應廷試復同日除官每人一朝輒相約同行

執手送君期色養牽

裾屬我味園蔬

潁行以儉屬

明春雁返漁陽塞盡是相思兩字書

懷甘遐齡

并敘

分離四載寒暑八更言念清輝恨一方之天各緬懷令德

悵兩地之人分望紫水以縈洄愁思萬斛指苙山而結想

渴縷千條惜無縮地之方空有望梁之歎勉成八韻用達

寸心

交情重金石雅意薄陳雷北斗依天轉南雲逐地來魂銷千里

月腸斷一枝梅何處伊人在臨風漫舉杯

把臂知何日遙情繞寸衷暮雲飛翼北春樹戀江東冷落三秋雨淒涼五夜風關山雖遠阻不隔夢魂通

喜雪二首

霏霏亂拂竹枝斜放眼欣看六出花十二瓊樓仙子宅三千銀界苑王家月魂淡處寒光徧鶴夢醒時歸路遮便欲尋芳登泰岱好從蓬島借雲車

黃雲輕傍碧雲流無數瑤花散不收西北千山新玉嶂東南半壁舊銀州及時默化蝗無孽潤物潛滋麥有秋郊外小民樂歲稔瓦盆煨酒賭猜籌

除夕送兵次熊大京兆韻

聖意安邊切

王師紀律清
士民欣有象
鷄犬靜無聲
萬騎奔雲出
千軍擁月行
披堅探虎穴
高築受降城

衛兵勤策馬
返旆事澄清
惜老求民膜
朝元警柝聲

是夕京兆歸宿普濟

堂兼查養濟事

桃符新歲換
鼙鼓靖邊行
明旦卿雲麗
韶華滿

帝城

題畫

好似西崑不熱邱
高松疊嶂曉煙浮
山翁未識閒車馬
傍晚驅歸草徑牛

賦得梨花白雪香二首

百卉爭紅紫清芬見此花一枝春帶雨千樹雪凝葩皎潔冰魂
馥紛披素影斜似梅香自冽比玉潤無瑕素蕊含輕露瓊姿妒
晚霞蘭房偏戀蝶粉署不藏鴉淡淡迎風韻溶溶映月華上林
獨擅美桃李漫相譁

看雪三春夜梨香滿院花瓊瑤結素蕊蘭麝裏冰葩洛下千枝
潔郭西幾樹斜搖風清亦馥帶雨淨無瑕既有香同桂何爭豔
似霞月明迷夢鶴風細冷棲鴉瀟灑離塵俗輕盈冠物華玉容
非寂寞真態絕諠譁

闌中對月偶成

年來幾度入文闈又見冰輪滿院輝
倒海明珠千萬斛波光搖動錦鱗肥

當空月白瓦鋪霜棘院春風夜轉涼
見說長安花似錦幾人得意馬蹄忙

相上未能司玉尺勤勞亦許効樗材
月明鳳閣三千界人在蓬萊頂上來

閣中苔蘚桐峯索酒原韻兼呈陶乎中

棘院羣羅上苑賓自知慣作舉公隣
甕頭雖乏中山味也是糟糟解醉人

代馮介亭下第後答其兄新孝廉元韻

送君西去正當秋紅葉山頭樹樹稠秋月春花看不盡是誰歡
樂是誰憂

無計追塵可奈何夢中亦覺抱慚多饒他古硯堅如鐵鷄案重
教十倍磨

朝來懶把彩毫揮未識相思是與非盼到擁爐寒夜後笑迎都
下孝廉歸

送吳宮允雲巖視學粵東兼以誌別

春光冉冉惠風和

聖世遭逢異數多嶺表英才歸化育海南文物入搜羅持盃漫
唱陽關曲立馬欣賡白雪歌

宮允行時贈詩者甚多

柳色兩行青在目明

朝何地覓鳴珂

對策曾經

御寶封同朝喜共語從容暖風送別三三徑細雨飛來六六峯
仙使有心披霧豹故交無計化雲龍嶺南此去敷文德指日泥
書賁

九重

壽萬友霞七十

遲遲春日浣花天萬里和風拂綺筵紅杏暖烘柔朮火綠楊晴
放煮茶煙簾添海屋輝三極頌獻華封紀八千自是長庚星不
老逍遙辛孟落蹠蹠

精神磊落清於雪南極星輝碧漢高席上酒醺彭澤菊盤中菜
獻武陵桃斑衣濟濟崢嶸角玉樹森森集鳳毛庭外彩雲羅壽
域九天長錫駐顏膏

贈本縣德大尹

大尹名德
貴滿洲人

欣從都下挹丰神冰鑑高懸迴軼塵柳拂銅章來梓里霞蒸墨
綬出

楓宸絃山化普花爲滿紫水風清雉亦馴此去淮南淮北道口
碑無地不陽春

荅范大埜昀見贈原韻

得負衣冠八尺身也隨鸚鵡立名津入朝經濟慚先達到眼詩

書愛古人若爾不求卽不忤但能憂道豈憂貧芝蘭兩地空惆悵一片離情倩紫鱗

未識前身與後身漫勞車馬涉迷津一簾明月懷佳士十畝梅花夢故人職守自知鳴珮重朝回誰信典衣貧煙橫楊柳清河在直沽風翻五色鱗

在天津
在天津

賦得綠滿窗前草不除

芳艸當時發菁菁映碧幢化機融大地生意滿晴窗綠襯長松
澄青連弱柳江三春滋曉露五夜對銀缸漫道質原薄休言力
易降和風拂釣艇帶雨潤吟艚體物觀新色攤書引舊腔託根
依

上苑葱蒨動人眩

三月二十六日之刑部任諸身行焚香跪送咸至泣下蚩蚩愚情殊堪憫念因口占三絕以示畱別之意

六載居官凜四知肯誰侵擾肯誰欺祇知勤慎彌才拙不計他年去後思

謬承

恩命轉秋曹判事羞言宿有勞誰料舊時諸赤子馬前遮道進春醪

攀轅獻酒瓦爲觴泣下沾衣我亦傷無物可畱惟一語早完國課莫欺商

過張氏山居和壁閒韻二首畱贈主人

爲訪幽棲客何辭遠度關到門祛俗韻入座接仙班玉樹階前
秀靈椿世外聞清言方不厭明月滿千山

地僻塵囂遠何須晝掩關有門臨綠水無夢到朝班翠竹干霄
茁蒼藤挂月閒四時清興足把酒臥看山

過息縣贈金大尹

大尹名潢號賢
邨順天舉人

地近河陽識治淳登龍何幸挹清塵琳瑯滿壁詩中畫珠玉盈
囊筆下神自有廉能消積牘還將風雅覺斯民卽今淮北淮南
道盡是絃歌化裏人

和葛懷初龍門道中韻

聞說龍門道無邊慧像生香山雲樹淨伊水月波清麗句刊磨
出

宸章歎睡成

山上有御製詩碑

何時欣蒞止駐馬看崢嶸

酬梁素存見贈韻

昔年風雅振箕裘

公先大父以風雅稱有集傳世

又見蘭孫上國遊倜儻才華

人是鳳玲瓏心腑月當秋千金寶劒撐瑤闕萬軸牙籤擁畫樓
繼世家聲高泰岱莫將懷抱負旁求

瑤章一似黑貂裘千里相遺感舊遊雪柏襟懷貞似玉幽蘭氣
味淡於秋魂銷雁足三更月目斷雲根百尺樓花落花開春夢
杳鴛鳴何日復相求

哭黃五御繁

忽聞下世歎沈淪不禁潸潸淚滴身作賦有神歸絳闕招魂無

計挽靈均捐軀節重青年婦

御繁沒後其妻卽殉節自經

泣血心憐白髮親

恨我天涯空悵惘素車相送屬何人

曾因過我連晨夕誰道分襟永別離

余請假在籍御繁過我數日別後遂成永訣

早

有文章畱典籍竟無壽筭到期頤長埋玉樹人爭惜忽斷金蘭

我獨悲十四年來成往事

自庚午迄癸未訂交十四載

不堪回首憶當時

丁亥夏六月於役岷階道中雜詠

清流曲曲繞柴門路入岷州山下邨耕雨鋤雲幾歲月數聲啼

鳥伴朝昏

培蔭軒詩集

卷一

三

晨發岷州曉月殘涼風颯颯怯衣單披裘上馬衝風去端的山
深六月寒

火繖撐空照隴頭春禾纔見穗初抽農民說道由來久七月中

旬是麥秋

甘肅農事
歲祇一熟

冬衣毛褐夏衣麻

岷州至宕昌土人
多種麻績布爲衣

終歲辛勤苦作家偏是無

知小邨女山花猶插鬢邊斜

萬山重疊蘊蒼穹一水名江走白龍傍水依山行不得斷崖接

木駕飛虹

自岷州南順江而下名白龍江有險阻
則鑿石接木如棧道土人呼之爲橋

不是山邊卽水邊數家人戶突炊煙饒他板屋高如許尙起層

樓望遠天

由岷至階居民皆起樓以
竹籬爲牆壁上苫木片

苦樓木片輕於瓦削竹編籬便是牆只恐地高風勢惡壓將石

塊一行行

苦樓木片以石壓之防風吹去

羣山環裏路全遮山外高峯一望賒遙向茂林深處問居民指

點說番家

舊是羌戎化外疆而今番族亦馴良

番人聚居部落名為族

看他婦子熙

熙樂也事畊耘納地糧

歸順以來與民人錯處相安耕鑿

三三兩兩遇番蠻跨馬何愁行路難裝束不分婦共女祇從垂

辮別雙單

番俗婦女皆垂髮辮婦人雙女子則單

一徑紆盤高復低陰平古道未曾迷經行不問前途險且看飛

泉落小溪

破蜀功勞薄漢霄緣山劈路鑿山腰祇今絕壁懸厓地西得人

呼鄧鄧橋

乾江頭南有鄧鄧橋相傳爲鄧艾父子所建

夾江石壁高千仞路斷狂流勢正驕不是鑿山開棧道那能飛
度出重霄

崇山夾岸護江來一水中流去不回

用唐人句

高浪激灘奔似電怒

濤搏石響如雷

山多頑石地多沙好土無多可種麻獨有山椒紅爛漫家家栽

得滿園花

自宕昌以南至西固一帶與四川相近山多雜石不能種麻土人多種花椒爲業

武都山勢太嶙峋石積沙灘隱似鱗惟有近城風景好盈眸綠

翠稻秧勻

甘肅自蘭州往南歷鞏昌至岷州其間山多水少農民所種祇麥豆青稞之類至階州附郭始見稻秧眼

新界一

哭吳麋颺

回首離家二十春

余自庚午入都迄今已二十年

故交逐漸見沈淪而今君復

歸西去又歎尊前少一人

逝者如波不可留傷心難禁淚頻流芙蓉城外三更月可是新

修白玉樓

曾記當年景范堂君來促膝話偏長

余守慶陽乃范文正公舊治有堂顏曰景范君至居

其中間連數日而別誰知別後無多日底事追回祇自傷

浮生冉冉總如雲往事從今不可論回首故園悲思切那能芻

酒慰君魂

風流雲散感傷多
道遠難聽薤露歌
他日歸來親酌酒
墓門松相看如何

題岑雲泉秀野圖

雲泉浙江山陰人名鼎

數竿修竹隔林看
一樹桃花簇錦團
到此應知身世闊
坐來惟喜水雲寬

半畝清池繞岸花
當前生意樂無涯
科頭不是偏豪放
腹有詩

書氣自華

用蘇句

會心人自鏡中來
隨意凝思坐碧苔
最是忘機狎鷗鳥
綠楊深處任徘徊

風度端凝問學優
論才應不老林邱
好將五色如花筆
去伴西

清供奉儔

日麗風和正好時柳枝桃葉盡丰姿多情只合閒消遣莫爲韶

華感舊思

君有東坡朝雲之感

倚馬裁書筆有神景行才調更超倫幕中收得東南寶慚愧蓮

花作主人

諸君有以蓮幕風雅爲頌者故云

贈顧星橋孝廉

聞說東南美乘軒入境來有山皆淡遠無水不潏洄勝地饒靈秀名流盡茂才鳳鳴千古士相見喜相陪

風流江左冠才調早年知淹雅文通筆清新白也詩已看折桂早莫訝探花遲勝事投簪日相期在及時

暮春蒼岑雲泉寄懷原韻二首時於役淮壩

綠楊夾岸漾輕絲江北江南兩繫思
淮上黃昏推櫓地衙齋清晝卷簾時
三春游屐懸高閣鎮日扁舟傍古祠
最是關情香雪海未能同賞百篇詩

和風輕拂海棠絲鄭重瑤篇寄遠思
清到淮流新月夜豔當花發早春時
多情惟愛尋雲石雅況偏宜拜水祠
回首山房琴月靜不堪重讀錦囊詩

陳情貽封兄嫂蒙

恩俞允恭紀

鮮民漫說苦如何卻喜遭逢異數多
黃口早年沾

愷澤

八歲時卽蒙賜蔭

青春長歲沐

恩波分符日下趨

金闕珥筆雲司聽玉珂端賴

聖人垂憫惻從教孤露得陽和

秩宗理學肇箕裘

時奉旨徵取先大夫遺書有究心理學之目

爲歎零丁祇自憂七

代香禪緜一綫

寒家至予已七代單傳

三朝厚德邁千秋承家有志追前業報

國無能劬遠猷今日又逢

丹詔下敢將心迹愧鳴騶

曩時矢志雨銓寒認取綱常處萬難兄竟無兒悲數短我惟有

培蔭軒詩集

卷一

七

嫂得身安措門力瘁滎陽鄭制服心師吏部韓一紙陳情邀
帝鑒紫泥封下五雲端

曠典由來不易逢

聖慈逾格特旌庸春回天語光彤史雲護龍章耀女宗載拜
新恩歡動色追維舊德涕沾胸兒孫須記

皇仁重家受

三朝四世封

接奉先兄嫂貤封

誥命至署時幕中諸友同星橋顧子咸稱賀畱讌琴月山房星
橋卽席賦七律二首誌喜諸友皆和之大司馬彭芝庭先

生亦贈長句依韻奉酬

西清載筆侍朝煙青瑣金聲萬里宣自有文章華上國更饒蘭
玉列階前輞川賦詠詩中盡洛社優游物外天羸得鶯湖勤教
育及門桃李盡英賢

時大司馬主講紫陽書院

聖朝原自重彝倫錫類重沾

異命新理學淵源伊洛水絲綸彪煥上林春

時奉旨飭取先君著述有究心理

學之高賢風雅詞壇主麗句清新藝苑賓彌教每慚無報稱敢

言孝友覺斯民

先生有孝友覺斯民之句

紫陽書院掌教偕諸生美其事倡詠成帙又賦四十韻

昭代隆敷錫

覃恩徧萬方小臣攄素悃

聖主賁徽章頂戴

褒嘉重迫維感歎長鮮民誰似我往恨幾迴腸共識庭闈樂偏
多骨肉傷八齡悲怙失四歲慘慈亡熒疚身何倚伶仃體未強
那堪兄早世剩有嫂居孀志以冰堅矢心惟日出當瞻親頭已

白顧我口猶黃代子終烏哺非雛得鳳將衣裾皆手製湯藥必

親嘗痛見桑榆沒誠求宅兆滅涕洟憐兩世辛苦舉三喪

已巳葬先

君先嫡母先慈母於祖塋

不惜家資置頻憂學殖荒劬躬兼教養薄植賴勵

勸梓躬承喬蔭星微近斗旁燕臺營桂玉秦塞歷關梁

予以蔭補順天

通判海歷部郎泊出守慶陽調補涼州皆奉嫂之任

歲值黃楊閨雲沈寶婺茫依棲四十

載催謝六經霜扶襯歸絃國移官蒞海疆

嫂歿於丁亥冬次年春屬內子扶柩歸葬

辛卯調任江蘇撫時心惻惻回首意茫茫報德紆籌策陳情實恐惶

皇仁宏庇護

帝德溥汪洋異數千秋遇幽貞九宇揚布荆嗟永逝禴翟爲誰彰稍荅勤勞績聊申節行芳私衷欣獲展

愷澤總難忘惟切捐糜志期將覆載償所敦良細曲歸美太恢張披拂鸞鳳彩雕鐫璧月光鴻詞霞燦爛麗藻錦輝煌誦滋慚恩徘徊動慨慷事原關性命譽亦繫綱常弼教思無忝明刑慮不遑願偕髦秀侶共涉聖賢堂文學先儒里東南高義鄉風流知久扇鼓舞詎能量根本人咸篤祥和俗自康淳龐堪入

告庶弗愧臬臬

除夕前二日增履庵方伯招同舒尙衣斐章保參戎礪堂
遊靈巖至高義園作

歲暮今朝早放衙聲聲欵乃到山家漁舟隱沒湖煙遠僧舍依
稀樹影斜過眼韶光爭日麗盈門彩勝鬬年華隨君漫說饒遊
興爲愛民人樂事賒

天平勝迹傳今古

御筆題名重昔賢

園名係
御題

四壁晴山羅畫境一泓清水貯雲泉

梅花已透春前信爆竹頻催日暮煙景物隨時成妙賞放懷高
義共流連

癸巳春朝自常州歸舟次無錫因同岑雲泉荆星海重遊

惠山

三吳來涖雨經年今日重尋第二泉古木參差藏梵宇遠山高

下沒平川敬瞻

御筆題名蹟親拜旃檀學老禪同向僧房詢往事竹鑪朴製尙
依然

重來勝地水雲寬恰值春朝薦歲盤邨舍家家無字福

無錫風俗門聯

不書字以爲無字福讀字

與事同音謂無事爲福也兒童處處有餘歡手磨石壁尋蟲迹

目汲山泉煮鳳團坐久渾忘歸路晚一輪明月上闌干

時正月十三日

清明日有以龍井芽茶見遺者題以明前詢之則稱近年

來采在清明前者爲佳其色嫩而味清過此爲雨前卽少
遜矣適顧星橋孝廉陳月泉岑雲泉高一初俞西溪唐味
蘭倪曉綠荆曉山何柳邨諸茂才同校書琴月山房遂以
惠泉烹之色味俱美果妙品也按茶之佳者造在社前其
次火前其次雨前雨前之說世人豔稱之而社前火前非
讀書之士不知也今明前之稱起於何時倡於何人莫考
其自要以火前爲是然學者嗜古而世俗好奇自有此名
向之豔稱雨前者必倡其豔於明前而爭相矜尙矣因思
古有茶社今日得佳茗飲佳客卽以明前詠之俾繼聲火
前不亦可乎星橋卽席首倡余亦成四絕句諸君咸屬和

焉

桑苧風流勝酒仙
嫩香浮枕月侵筵
摘來寒食山頭蕊
贏得新名占雨前

曾記春朝煮惠泉
山房今又試新煎

余於立春自常州歸舟次無錫偕岑雲泉荆星海登

惠山汲泉煮龍井茶同賦二律

草英近有明前號
好補茶經第四篇

采得靈芽分外鮮
西湖風味酒杯邊
酣來一盞如甘露
人在蓬萊月在天

雲居松嶺各爭妍
更有風篁早占先

龍井有風篁嶺

一自明前傳雅韻

茶煙新句續樊川

閏三月三日琴月山房牡丹盛開集諸賓友讌賞其下分

體賦詩以良辰美景賞心樂事爲韻余得良辰字賦五律

二首

三春花事盡獨爾殿羣芳玉珮紅嬌淺金裙紫膩光無雙標國
色第一發天香雅有南樓興開筵及夜良

重逢上巳辰花下會嘉賓細雨培香蕊微風託錦茵漫誇諸葛
數共醉洛陽春勝日同吟賞誰人巧思新

次增履庵方伯牡丹詩韻

偏饒國色殿羣芳嫩蕊重葩得得彊曉露初凝香馥郁和風輕
拂韻悠揚一枝濃豔清平調千朵殷紅錦繡章回首洛城煙景
好敘花何日續歐陽

彭芝庭大司馬見示和章疊韻奉荅

春紅落盡此花芳
南北何殊總自彊
國色偏宜清露蘸
天香無

待曉風揚正封妙句傳騷雅

謂方伯原倡

永叔佳篇重典章

謂芝庭司馬

正好滋培供咏賞
莫教其雨忽朝陽

送友人赴京應試

送別閭門外
行行過鳳橋
河添新漲滿
山隔曉雲遙
五兩輕無恙
雙橈聲正嬌
前程發此日
鵬翮看搏霄

送友歸舟至虎邱作

四月江南地
清和景色饒
綠陰籠古墓
新水沒平橋
麥結黃金實
秧抽翡翠苗
虎邱千載勝
乘興蕩輕船

錢宮傳香樹先生書札往還皆關道義不僅筆法之工也

裝潢成卷先生題三絕句於後謹依原韻奉荅

服官忽忽廿年更固陋常懷愧後生賴有靈光先達在辦香今

喜又通名

先生在聖祖朝與先大夫同詞館余初入都時獲見顏色先生旋予告歸里逮余官部曹荷司農師

薦舉得時訊起居後則南北睽隔致疎啓候今

三朝耆舊懷鳩杖九老

溫綸問席前卻笑當年白少傅故園曾未過東阡

朱子詩忽念故園日東阡

時一過自傳晚居洛社不及先生之優游故里也

尚書老筆由來健當代鴻儒超又超

論衡云文人逾通人鴻儒超文人所謂超而又超者也

收得芝英草十紙不須萬貫羨纏腰

孫西林觀察遺荔枝乃蔡忠惠所稱紅鹽者水浮至吳香
味幾與鮮者無異想海船風順爾顧星橋孝廉首倡余亦

次和

海洋鯨浪風正長海舶乘風供遠香到來丹荔不十日紅鹽浸
出冰雪涼離離嘉實真歷落暑窗恰稱懸珠箔由來此果數陳
紫絳囊剖破桃花膜我將西域較東閩葡萄綠色誇芳新今噉
側生亦奇特兩兩佳味堪比珍當日楊妃偏嗜愛微醺瓠犀飲
玉濯若知瀘戎邇興泉

杜子美有憶向瀘戎摘荔枝之句

驛騎紅塵更苛碎風

流白傳詠新詩品第尤詳忠惠辭嘗罷卓然思味美江橙盧橘
詎同時

次顧星橋孝廉夏日招芝庭彭大司馬虎邱讌集詩韻卽
呈大司馬

一代吟壇欽大雅閒情恰是友生招香山耆碩鳩爲杖婁水才
人桂作橈竹院靜藏清影密柳橋晴放綠煙饒搜奇徧紀名山
勝著述而今比鄭樵

暑窗尋勝泛流觴到眼芙蓉正放香彩鷁底須桃葉渡畫船宜
泛柳絲鄉塔垂晴影浮清沼雲湧奇峰襯夕陽聞道賓朋共吟
賞不知身世有閒忙

有竹籊和星橋題扇頭畫竹原韻

徙窗依竹闢新移坐對虛心愜素期一自清風來便面衙齋恰

稱卷簾時

星橋初度詩以祝之

六月芙蕖正吐香庭前戲彩恰相當靈椿濡露千齡瑞

太翁年八十二

尚強健

矯鶴凌雲萬里翔裴相龍鍾時未至李郎龜息日方長燕

風特啟華堂宴雪藕冰桃好佐觴

題倪曉綠歸舟入夢圖

曉綠浙江山陰人名忠謀

千巖萬壑山陰道競秀爭奇各不侔一自倦遊思故里滿川明

月照歸舟

同屬黃梁未熟人邯鄲車馬往來頻君今入夢歸舟去可是盧生覺後身

不識浮生竟若何
肯勞心力等拋梭
扁舟江上藤蘿月
幾度清風起皓歌

信口偶然成對語
抽思自覺少推敲
風流太守偏多事
吟入新

詩便解嘲

余代曉綠題其姊課子圖有投筆自慚班定遠吟詩還讓謝夫人之句平瑤海以爲巧用姊弟故事卒成

一律瑤海由庶常改縣令遷郡司馬權雷州守

重陽後一日虎邱訪王夢樓探花承贈句依韻奉荅

姑蘇城是舊吳城
暫放閒情一送迎
九日風光宜帶雨

初八日微雨

三秋農事喜初晴
山經霜降客偏肅
菊到重陽氣正清
最是登

高能作賦瑯琊才子唾珠成

昨朝爭說是重陽
爲訪名流看菊黃
幾樹丹楓依水榭
千畦紅

稻繞山莊漁歌滿地生秋浦雁字排空帶晚霜極目時和多快
事劒池清映紫書方

眺閣觴樓鬪豔陽秋來祇見菊花黃江城本是衣冠里名士原
居丁卯莊塔際露凝千點玉劒光星燦一池霜閒情莫漫催歸
棹晚翠西山映上方

寒山看紅葉同保廟堂馬上口占

曲徑繞柴扉丹楓映翠微秋山堪畫處不盡野雲飛

小春望前四日琴月山房讌集彭大司馬見贈二律次韻
奉酬

對策當年護璽符

廷試第一人
以御寶封試卷

萬言何羨董江都西清載筆

呈金鑑南國衡文湛玉壺九老耆英

天子詔兩朝青紫世臣紆願承音旨親先達政謂能維空谷駒

妙句欣看郢匠揮竹籜風靜篆煙微

時移坐有竹籜

二難自我慚賢主

三載從公仰德輝

堂到蘇已及三載

盡代文章兼李杜出羣才調盡雲

機

座中皆東南佳士

年豐民樂人多暇百盞休辭戴月歸

秋日和保參戎同遊華山四首原韻

秋深林木盡丹黃獨有喬松閒色蒼極目霜花明似錦也勝桃

李鬪春粧

竹籜曲曲隱山扉石徑盤旋入翠微遙望太湖三萬頃水天霞

鷺一齊飛

年豐差喜解民愁暢好追尋風物幽小憩僧房看稻種

時寺僧已將新

稻收包爲來歲種子

不虛同上放衙樓

釋惠詩稻花香入放衙樓

坐汲清泉試小團蓮花峯下一池闌歸來細味新奇韻好把西山拄笏看

長至日大雪初霽岑雲泉李裴園王遠庵唐味蘭邀同增

履庵方伯顧星橋孝廉暨薇署諸君讌賞賦詩以日光繡

戶初添線雪意屏山欲放梅爲韻分韻得山字成七律二

首

欣逢至日行時令氣以升新雪滿山海湧一峯開玉障天平萬

笏拱瑤顏圍鑪索笑梅初萼翦燭追歡月半彎

時冬月初八夜

六出表

年豐已兆衙齋差喜慰痾瘵

賓朋雅聚東南美才思咸稱大小山席上暖寒成令會簷前披

素對孱顏陽歸律驗黃鐘應陰謝冰凝碧玉彎不用遠尋占五

蓋

郴州五蓋山歲冬至以雪占年云五蓋雪普米賤如土

笑看冬積釋毗瘵

語云冬無積雪夏無餘糧

分韻後又同雲泉星橋味蘭卽席聯句

長至霏霏六出花

雲坡

春風先臘報官衙

星橋

陽生葭管迎初

日

味蘭

寒散銀屏照晚霞

雲泉

半壁瀛洲添玉障

雲坡

一宵香

寢賦冰車

星橋

良時命酒燒紅燭

味蘭

樂事賓朋笑語譁

雲泉

瓊瑤下壓竹枝低

雲坡

飛盞催詩小閣西

星橋

梅蕊乍舒橫玉

砌

味蘭

松姿彌茂拂璇題

雲泉

圍鑪快聚神偏爽

雲坡

擊鉢清

吟思不迷

星橋

山簡習池今彷彿

味蘭

何妨遙夜醉如泥

雲泉

題宋生蘭城聞川泛櫂集

聞川風景任搜羅
譜入新詞泛櫂歌
山水有情明月在
鴛湖佳話竟如何

蘭橈認取苦吟身
形管編成中饋人

生配戴月卿輯有中饋要覽形管藻編

教得

雪兒歌麗句頓令吳越一家春

生有侍兒一吳人一越人

冬至雪後五日增履庵方伯招同舒尙衣綱齋保參戎礪

堂讌集虎邱寺後山卽席聯句

共上雲巖寺

履庵

川原望不窮

綱齋

風帆明滅裏

礪堂

煙樹渺

茫中

雲坡

勝地成幽賞

履庵

良辰仰化工

綱齋

孱顏看積素

礪

堂同此樂年豐雲坡

江城雪霽後履庵風物總堪誇綱齋臘破梅先萼雲坡陽歸麥

早芽彌堂邨春借暝樹履庵漁火點寒葭綱齋不盡登臨興雲

坡疎鐘起暮鴉礪堂

十一月望後三日有竹籜雅集同蔣榕盒王夢樓鄭硯農

顧星橋俞西溪岑雲泉唐味蘭姪西山聯句

良會欣逢長至後榕盒庭前積雪小成山夢樓香生綺席梅初

綻硯農影動虛籜竹有斑星橋黃絹新詞花下就西溪白波雅

令座中嫺雲泉年豐好共賓朋樂雲坡興逸多因簿領閑味蘭

翦燭他時懷舊雨西山浮杯今日判酩顏榕盒柳汀韋寢傳佳

事夢樓未信前徽不可攀硯農

疊韻奉和錢太傅再題書幅後

供奉

三朝重老更一時文獻屬先生耆英久沐

君恩厚岳立河靈仰大名

畜德能文兼擅美淋漓大筆喜光前無慚碑頌傳千古不比南

陽自署阡

抱道還鄉臻上壽懸車聲望益崇超歐公筆勢黃河水願學南

豐一折腰

歐公會爲南豐祖作墓銘南豐致書拜謝

題增履庵方伯家慶圖

氣潤河靈推世德貌雄岳立仰清姿同舟鎮日追陪處雅度從容是我師

鴻案相莊貌儼然齊眉今日正朱顏珠圍翠繞夫人座興慶行排列首班

春滿華堂榮書錦柳枝桃葉盡柔嘉眼前風月平章好莫遣多

情繫落花

圖成一姬已下世矣

玉樹盈階總少年荀龍辭鳳各徧繼功名鼎盛傳他日不數汾陽瓜瓞綿

登金陵城

龍盤虎踞說金陵終古長江繞石城六代鶯花無剩豔兩湖煙

水有餘情

謂元武莫愁二湖

雞籠山正迎辰極牛首峯高拱太清到眼

居民成百萬管絃聲裏樂昇平

高城百雉壯江東往迹都歸指顧中桃葉渡頭桃葉杳雨花臺
畔雨花空三山縹緲當天塹二水潏洄孕化工安石風流今已
矣一墩何事尚名公

城內有謝公墩

培陰軒詩集卷一

男麟校刊

孫仁益正字

培蔭軒詩集卷二

光山 胡季堂

古今體詩一百六十一首

正月十三日晚出金陵太平門夜宿棲霞寺次日由萬松山房尋幽居登最高峯

太平門外鍾山北一路長松閒石橋山色水光隨馬轉不知前導尙楊鑣

林巒錯繡路迢迢策馬江鄉景物饒樂歲人家金鼓振邨邨鐙火闌元宵

好山逐漸裏前蹤路到棲霞佳氣濃明月滿天僧滿寺隔林忽

聽一聲鐘

偷閑特地宿招提
尋勝頻驚午夜雞
曉露初凝鐘未歇
捫衣先出寺門西

萬株蒼翠徧巖阿
百尺虬枝帶女蘿
謾謾曉風時到耳
濤聲不羨廣陵波

結廬曾說明徵士
一片清華不染塵
雲石滿山人迹少
只饒松竹占高隣

雲片曾叨

御筆題

山石玲瓏層疊
題雲片二字鐫石上

御

層層透瘦碧
峯齊元章太守雖多

癖拜罷難將兩袖攜

振衣直上最高峯培塿諸山是附庸縱目雲煙蒼靄外大江東
去浪千重

舊歲重逢上巳衙齋牡丹盛開粉紅一色曾與幕中諸君
讌賞分韻賦詩成卷竝命家奴彭國才寫折枝於卷首荏
苒流光彈指卅歲名花依舊發香且開紫色一朵雜於眾
花之次覺粉娥嬌中添此紫羅袍更饒豔麗矣向之有無
此種莫可考但余來此已三閱春皆未之見今忽開一朵
或有所爲昔魏公芍藥故事予曷敢希諸君中必有後至
如陳太傅者特設小酌與諸君共賞之並各疊前韻復命
彭奴另肖其體寫一幅余依前韻仍賦五律二章

春風忽一載又見此花芳舊愛楊妃醉新添學士光錦帷籠豔
蕊翠幙護濃香金帶開筵日賓朋盡儔良

花開及令辰鶯燕正賓賓冉冉雲生袂重重翠作茵紅嬌千片
錦絳豔一枝春載展題名卷敲詩各鬪新

保礪堂叅戎署中重賞牡丹疊和履庵方伯舊歲原韻

花時又見牡丹芳不息流光看自強明豔照檐霞燦爛煖香盈
幄靄飛揚賞筵擬接金錢會覓句頻賡玉局章最是多情勤愛
惜錦棚高搭護春陽

富貴何須豔洛中且看雲疊錦爲叢吳門煙景文通筆江左詩
篇康樂風金帶宴開宿雨霽玉樓人醉夕陽紅喜陪上客同吟

賞銀燭高燒與未窮

首夏過程在山逸園卻贈二律

園在西蹟山
西臨太湖

幽棲聞道逸園好中有詩人臥碧岑極目湖山歸坐嘯繞邨花

木供行吟鯉庭獨立閒時課

一子自課

鴻案生香夢裏尋

室人願氏能詩已逝

著有生香艸

祇許野雲同去住不關心事任浮沈

在山不入城市已二十年矣

地僻真能遠俗氛北山何用再移文清暉閣上三更月騰嘯臺

邊萬頃雲

臺下卽太湖

新竹亭亭凝黛色老梅山曲擁苔紋眼前無

限風光美終歲優游總讓君

長句再贈程在山

姑蘇城外鄧尉西漸來深處漸幽寂中有詩人結草廬面對九

峯嵐翠滴

圖有九峯草廬

香雪梅花是比鄰亭亭修竹園四壁雲山曲

曲絕塵氛清宵愛弄高樓笛不入城中二十年泉石棲遲成性癖有時長嘯獨登臺臺下茫茫煙水碧有時靜坐思元虛皓月一輪天宇闢興酣往復發狂吟中饋酬聲成勍敵唱隨詩草自生香底事絃推動悲感階前蘭玉茁新芽一編手自勤訓迪終歲悠游樂有餘遲暮無心歡捧檄我來吳會今三年碌碌何能勤轍迹偷閒今日訪名園接談且喜成良覲到此都忘步履疲清華滿目情彌適寄語主人休閉門他時重著尋山屐

題吳夔庵懷水圖

夔庵名克諧浙江石門人

春明門外憶春游逝水年華已十秋今到江南重識面畫圖猶

是舊風流

湖光蕩漾淨無波
載月乘舟自在過
秋水伊人清興足
長風萬里待如何

夏日過彭大司馬芝庭先生春暉園卻贈

森森喬木世臣家
環映春暉景物賒

天子特題慈母竹

應懸慈竹

御題春暉額

祖孫雙占上林花
當年雅望畱

青瑣此日清風擁碧紗

應設碧紗幮常讀書其中

最愛平泉瀟灑地
曲闌橋畔水紋斜

名園聞說似蓬萊
到眼清華亦快哉

虛閣涵青惟月共
幽軒延

綠有風來

涵青閣延綠軒皆園中勝處

寄情時著東山屐
遣興頻傾北海杯

先達今推白少傅喜依杖履得追陪

次保礪堂參戎過程在山逸園韻

鄧尉西偏笠澤東清華一路到園中結廬地接盈盈水著屐人
乘款款風邨舍新陰千樹綠漁舟殘照半帆紅參軍雋逸裁詩
罷韻事重添元白筒

題鄭研農高曠清穆圖

身似菩提心如止水對長松而神怡踞高山而色喜人世浮名
淡然而已

題王方伯梅屋讀書圖

憶昔西陲同五馬而今南國接雙旌樽前風月圖中景披對如

聞笑語聲

家住平陽汾水邊好從姑射覓飛仙坐來笑對霞融面

葛長庚紅梅詩

霞融姑射面

瘦影清神兩淨娟

翩翩風度正青春羅列牙籤視錦茵自是窮經能致用圖中先見讀書身

檢點篇章映綺窗絳團雪夜照銀釭孝廉船上神仙客引得人稱七寶幢

一簇花容擁笑容風流儒雅竟誰宗芸窗贏得紅雲伴可勝添

香幾箇儂

公侍姬多吳人有小印鐫紅袖添香夜讀書句

惠政新敷雨露霑公餘索笑尙巡簷試看此日承宣使猶是當

年舊孝廉

湖邊煙月任句留

余到江蘇公疊余西陲畱別原韻寄贈有江左風流君管領湖邊煙月我句留之句

大

雅扶輪展令猷更喜采風成繼志一時名士盡從遊

公在浙有采風繼志

錄考選時藝搜

羅名士殆徧

趨庭曾占西湖勝請業還餘絳帳春二十年來成盛事友生今

日亦州民

公前在杭從錢塘縣孫柳樊孝廉遊

題鍾蔗經注經圖

松鱗亞深阿竹翠交幽壑雲陰度虛嵐泉淙瀉重嶠此中有君子窮經欣寄託既愜山水情亦永丹鉛樂早歲坐石渠三禮資商推承制決羣疑箋疏振風籙園橋擁皋比淫哇靖一鐸南宮

久郎潛高義推典博浩然急抽簪獨往依林薄弓冶有傳人儒術稱循卓迎養蓋公堂重啟藏書鑰垂老更精勤編纂甘淡泊至今典型存深衣儼如昨披圖緬高風會見歸來鶴

題羅荆軒枯木棲鳥圖

森森古木自蕭疎不是尋常鳥雀居惟有慈烏知反哺許他三五占爲廬

一幅煙雲景物奇就中標格有誰知先生著意藏根固只寫扶疎老幹枝

題舒宸翁習射圖

早承世澤綰朝紆甲第連雲任自娛漫道閒情誇巧技祇緣壯

志在桑弧

端凝風度氣凌雲坐對清華愛此君
退食從容無箇事好教正
鵠習勞勤

花柳雙雙自鬪妍眼前風景浩無邊
多情我亦思游藝亭畔何
時笑拍肩

元日試筆

旭日初開聽鳳鳴氤氲瑞靄滿春城
九州一氣歸元化四海同
風慶治平淑景暗添新柳色晴光早送曉鶯聲
明良喜起賡歌
盛倡和連篇有巨卿

歲內夢堂大司寇有喜雪句與錢
籀石學士翁正三編修疊次倡酬

和崔拙圃大司寇煙九日會射石畫軒原韻

舒長化日是初春
雙圃從教步後塵
失鵲反求須正已
貫皮能事莫尤人
笑看東閣張筵日
喜作西園雅會賓
開府舊傳多偉藝
淋漓詩句更清新

和崔拙圃大司寇上巳日過昆明湖原韻

條暢和風拂面醺
當前景物總奇芬
四圍嵐氣煙連樹
千頃湖光翠接雲
穿柳新鶯添嫩囀
排空北雁早賓分
尙書老健多清興
退食優游紀見聞

春日郊園散直同崔拙圃大司寇曹地山少宰小集英夢堂借山樓和拙圃韻卽呈夢堂

退食春郊爛熳遊
相逢揖讓盡名流
喜攜太白三山句
來上元

龍百尺樓入座煙嵐歸藻鑒盈門花木供賡酬平泉此日春華地一品文章八座儔

和崔拙圃大司寇暮春由蘇州街過萬壽寺小憩原韻

帝里光華總大觀漫言春事半銷殘郊園雜黍間中味

是日英大司寇

留飲郊園

蘇市樓臺盡裏看映日海棠紅似錦

園中海棠正盛

迎風楊柳綠

成團同來勝地尋真趣爲愛蒼松坐石壇

拙圃崔大司寇招讌蘿月山房賞藤花卽席和韻

風信更番鬪曉霞紫雲重疊綴晴葩凝香燕寢紛披甚楚楚爭看萼綠華

古藤曲屈發新花嫩蕊垂珠紫蓋斜漫向畫圖頻比擬從來真

假不相加

時壁上有藤花一幅亭山謂其不似有花無葉亂交加之句

寄懷袁子才

過江名士久推袁吳下相逢月滿軒鸞掖文章畱舊價倉山著

述繚羣言平生契合惟元老

受知尹文端最深

半世棲遲爲壽萱我上

燕臺每南望最關情處是隨園

子才園名

寄懷增履庵方伯

過江誰是出羣才髯伯風聲徧八垓三載從容陪笑語兩情膠

漆重陳雷清神矍鑠翔雲鶴盛德滋培夾道槐聞道政成當報

最相期尊酒會金臺

寄懷韓湘巖太守

江左三年契幽蘭獨賞音汪洋千頃量皎潔一輪心判事花生
筆宣勞雨作霖雲閒當海角思共碧波深

丙申秋八月扈從木闌到熱河喜晤拙圃崔大司寇並讀
壁閒倡和詩卽用扈

蹕事竣回京喜作韻

出都經歷幾郵亭三月重瞻老壽星粘筆新詩真集錦迎門秋
柳尙畱青忘機庶類巢賓燕隨直仙班醉綠醺歸騎應知馳曉
月菊花開徧坐芳庭

讀拙圃崔大司寇熱河扈從金蘭詩冊

開府尙書老健身每從動處見精神

山莊退食聯吟社
寶刹尋幽遠市塵
馳馬不知年已老
拓弓常喜臂能伸
同來盡是真仙侶
秋月秋花聚德鄰

九月初二日駐烏蘭哈達
細雨如注繼之以風
因憶滿城風雨近重陽
之句輒成三絕句寄都門
顧星橋舍人席紫山魏鶴峯平遠亭三大尹

滿城風雨近重陽
塞外從教細品量
好景當前卽勝地
烏蘭哈達山峯
右嶺峻峭天然徧山丹林黃葉中老松參天青翠
滿目山下平川依邇河出其間寶園中最勝之地
徧山青翠雜

丹黃

紫蟹初肥菊正黃
滿城風雨近重陽
遙知校韻題糕日
培蔭軒中話正長

舍人況味淡如菊

星橋

大尹清名重若霜

席魏平三君

秋色小園成底

事滿城風雨近重陽

布達拉廟歌和岡卿曹慕堂原韻

山莊退食頻曳履結伴尋芳極瞻視我聞勝地有梵宮燿燿璘
班久貫耳替直幸得出關來傾聽仙班說滌止座中滿壁盡琳

瑯

到熱河與拙圃大司寇同寓滿壁詩箋皆瑯山莊退食倡和之作布達拉廟歌卽在其內

觀看未竟拂衣

起讀罷長歌復短歌壯麗寫來足自跋爰定下直一往遊天空

不礙高飛雉按轡偕行馬不嘶舉首宮城成迤邐磬鍾峯在河

之東羅漢趺坐長如此

磬鍾羅漢二峯名

行途坦坦轉山灣布達拉廟

眼前指紅牆高聳若方城石砌縱橫羅玉蘂偃僂小憩到中腰

山嵐平繞煙凝紫喘息流汗本陽和拾級自仗一誠矢樞衣緩
步陟層臺身到五雲仰天咫巍巍正殿最森嚴朱檻丹楹環不
已映日光華閃閃明數萬金鱗排雁齒俯瞰堅礪左右分浮圖
林立闔殿址迴廊徧走上下層變相萬千具綱紀中懸丈錦列
諸天眩目驚心燦霞綺雙旛翠蓋照長明端正妙相挂璣珥飛
閣中央

寶座陳

幾暇有時臨

玉趾羣藩享宴飫

天廚頂禮眾生大歡喜蒙古各部盡名王躍馬操弓熊虎似標

雄從古號天驕暴戾恣睢罔與比我

皇馭宇統六合教之都爲禮讓士輸誠久已効前驅向化人人
爭赴市見此莊嚴更傾心皈依佛法如佛婢邊境清和四海平
中外一家臻上理試從徼外數名山何處名山有若是瑤池西
極蓬萊東方丈瀛洲差可擬兜率宮在大羅天氤氲佳氣祥雲
裏

扈從木蘭秋獮紀事

風光曾記十年前

余於癸未歲
隨園一次

山水依然景物妍夾道番民迎

聖駕

此地有厄魯特回部諸
番與民人同跪道旁

太平中外樂踴躍

高峯聳翠石嶙峋豐艸長依幽澗濱人向茂林深處度小橋流

水絕纖塵

哨門內兩山石壁一水迴環草木清華最爲奇勝

峯迴路轉水重重高嶺豐碑

御筆封

哨門內有御製詩碑在嶺上

丹葉長林秋色老石巔時見後凋松

幾度山灣出廣川千軍雲擁破寒煙試圍雁翅排弓矢

轉入哨門卽阿

達密阿達密猶言小試圍也

盡是貔貅馬上仙

一塵不染草芊芊香氣迎人卷宿煙雨露沾濡生意足清芬原

自得天全

哨內草甚清香盡塵埃不染雨露沾濡自得本來清氣也

氍毹帳各隨宜棋布星羅任所施長短小旗標幌子白雲不

忘職當司

園中各立望竿上挂小旗名爲幌子顏色不一寬長殊製余官秋卿因用方藍布內篆白雲字旣以作記

兼識所司

秣馬荒山外版圖歸誠蒙古獻區區至今六十四圍內歲歲何

人敢牧芻

木蘭舊屬蒙古游牧之地康熙年間輸誠進獻永作圍場計六十四處蒙古各部至今無敢入牧芻者

殘星未散漏聲微駿馬嘶風早上圍安不忘危

家法在克繩

祖武繼前徽

腰弓控馬盡名王逐隊前驅護

聖皇聞道

玉音傳射鹿大家抽矢各爭強

圍內隨從各蒙古王公大臣必奉旨命射始敢發矢

山雞飛去人爭撲野鹿逸時馬各追

圍內狍鹿逸出圍外人人皆得撲射雉狍任取鹿則

應報明

縱目悅心觀未足

繳尾

六龍回處報先知

每隨曉箭直班聯待漏羣依

御帳前一望鎧光列星斗始知身在五雲邊

車如流水馬如龍人各爭前不可蹤更有科頭勒最猛

國語謂家奴爲

科頭勒爭

道最勇行來風送一箇蜂

車駝填道甚喧嘈每陟高岡若戰塵策馬上山尋別徑忽聞絕

壑響松濤

塞草盈川帶曉霜參差紅柳護羊腸

入峭日深河流漸細隨川宛轉呼爲羊腸河每爲豐

草所遮惟柳生河邊可識柳經霜後其葉盡脫望之枝幹皆紅或卽紅柳種也但矮縮耳

取來簪漠鮮堪食

著漠鮮蒙古所稱魚名出羊腸河內柳根之下味鮮如白魚大可斤許峭內無鱗得此可以媲美

不獨持螯與

味長

長城遺趾絕山陁此地曾聞百戰勝

過達彥達巴漢東西橫互一嶺傳爲古長城御製

古長城說鑒論精嚴鐫碑立山北西嶺上達彥乃戰勝處達巴漢乃山梁也皆蒙古語

考論精嚴欽

聖鑒卿雲常護

御碑亭

四山雲合雨罪罪

翠蓋無張不眾違

聖主習勞勤據馬崇文又見武功巍

哨內雨次遇雨行圍不輟上仍乘馬回營不御雨

具蓋習勞不逸也

行到三秋對晚暉山光凝紫暮煙飛纔過殘月又新月幾度排

班看打圍

八月十九日進哨九月初五日進哨初三日至坡賴圍已見新月如鉤矣

四十

音

八部列熊熊獵罷歸途

宴賞豐飽啖

御廚兼挾纈帳前稽首頌

神功

入座番王帶爪牙兩旁排列靜無譁殷勤跪拜皆臣僕中外方

稱是一家

出哨後賜蒙古哈薩哈厄魯特回部土爾扈特各王公宴及隨從官兵並賞給紬緞布匹荷包有差各

各跪拜如儀極其誠敬較之漢唐以來偶得一二國效順稱中外一家者爲何如也

勞來恩罷出營門跪道齋莊送

至尊回首揚揚催去騎誠心悅服各歸藩

九月二十三日扈從歸來黃花晚節猶見清芬因集諸親

友小酌賞之玉藻茂才卽席口占二絕依韻奉和

黃花晚節自遲遲扈從歸來一舉卮夜雨銀鐙相對處微風香

動卷簾時

西園此日興偏長春泛梨花侑客觴

是日飲梨花春酒乃口外所釀也

秋景自

深菊自淡傲霜畱得一庭香

丁酉元日過友人寓齋素食卽席和韻

春歸萬類入陶鈞又是韶華斗轉寅獻歲忝陪朱紫客退朝欣

接老成人不嫌脫粟盤無肉聊復銜杯酒上脣

主人與余皆不能飲三度

風光期後會

自乙未元日至今已三次矣

五雲佳氣去來頻

荅友人元日見贈原韻

聲望深慚白侍郎

集唐原句才子聲名白侍郎

也隨鷓鴣任翱翔三年同食

存真率萬類逢春鬪豔陽儉約持身思易學呼號畱客念難將

川張竦陳遵事優游化日誠多福兩鬢何妨漸似霜

讀竹井相國除夕及元日試筆詩依韻奉和

除夕

市語旺旺到處聞幾家忙迫幾安便香焚寶篆煙凝夕果獻椒
盤夜度年繞膝兒童歡不寐與街金鼓振難眠太平身世多餘
慶意氣從容自浩然

元日

喜逢大盛又韶年九奏聲中霽瑞烟

黼座光華常爛熳

帝城風物自喧妍薰陶化日皆多福管領春臺獨占先退食從

容餘樂事巡簷索句早梅前

公除夕詩有醉向梅花比霜
鬚與君一例是幡然之句

前詩未盡自述之意再疊一首

頭番芳信迓新年

元旦距立春五日

佳氣融爲柏子煙詩律未隨時日

老鬢華竟鬪雪霜妍慈祥性近宜依佛聖礎心多漫學仙已覺

知非成忝竊

余年四十九

慚無報稱可光前

丁酉夏出使江南過泰安望嶽

仰嶽由來久今瞻泰岱峯高疑天漢近遠接海雲封青帝隆敷

錫蒼生盡恪恭未能停驛騎握謁擴心胸

過羊流店謁叔子祠次抽圃崔宮保尙書題壁韻

輕裘緩帶鎮巖疆儒雅風流史冊光西晉人民資樂利東吳兵
將息猖狂峴山碑墮千行淚羊店祠畱一炷香拜罷低徊瞻廟
貌森森松柏肅烝嘗

過淮南東吳門諸友

一從北去已三秋每上金臺憶舊遊今到淮南更南望長江煙
水隔蘇州

到江仍是隔江思寄語嘉州老友知記否倡酬歸棹處惠山泉

畔月明時

岑黑泉自毘陵同舟回蘇登惠山
曾有倡和時癸巳正月十三日也

培蔭軒詩集

卷二

五

雅度每懷宣化使

謂增履庵方伯

清襟常念尙衣卿

謂舒納齋尙衣

故人消息

今何似咫尺難將笑語傾

紅橋南望柳陰陰景物分明記昔臨
只有故人消息遠姑蘇城外夜鐘沈

邵伯舟次舊幕友唐味蘭隨高節相至過我夜話喜而有作兼懷京中顧景嶽中翰蘇州岑雲泉茂才

三載吳門日歡心羣彥陪別來深夢寐握手重低徊
雅量披雲漢清言傍水隈不辭頻翦燭夜漏漫相催

舊交新把晤笑語共輕船不道三生幸翻成兩地牽
燕臺留景

嶽吳下滯雲泉屬意高攀桂相期會日邊

味蘭雲泉時方應省試

喜聞平瑤海太史舟至吳門有平江書院掌教之聘卻寄

二首

黃金臺畔經年別花雪聯吟憶范河聞道布帆歸去好鑑湖風
月幾回過

清才早得譽時髦幾載交遊意氣豪解纜過吳還繫纜平江人
士待甄陶

風篷水車

自六閘下河一帶處處皆有其製用木扎架中立直木柱一根上穿活軸下安大平輪大輪下

橫軸一安二小輪一與大輪木爪相接一與水車廂龍骨木齒相接旁柱八根柱蒲簾八扇如船篷隨時啟落腳繩活轉八面受風風來篷轉則大小輪互相推撥河水自然吸上不勞手足而坐享其利可謂安便矣喜成一律

木架高撐四望中蒲帆八幅挂玲瓏輕輪慣轉盈盈水活腳能

招面面風攬踏桔槔勞手足卷舒輕輓笑兒童

北方用輓輓取水必爲此兒

童所笑 稊緣

盛世人多樂巧占安便慶歲豐

興化事竣歸途舟次堃君自丹陽來晤喜談竟夕出墨蘭
屬題卽次畫中韻

漫教花雨說優曇對此幽芬食亦甘臭味與君同嗜好又攜詩
卷過江南

邗上舟次蒼舒綱齋尙衣寄懷原韻

銜

命赴江南感荷何能已驛騎在星馳風帆期順駛行行歷淮揚

隔江來一紙鄭重故人書殷勤詢近履淋漓發長歌繾綣復何
似深情宛轉閒恍若親音自往事動追回光陰惜彈指北上黃
金臺南阻滄浪淚懷抱各一方良時徒望美冉冉吳山雲澹澹
秋蘭菑三載黯然思一朝楚然喜那知金閨門咫尺難涖止南
望低徊閒薰風時過耳行笥貯朶雲邗水深無底

· 荅增履庵方伯寄懷原韻二首

奉

命深知

聖澤覃風帆輕便下淮南望中盡是盈盈水梅雨連江帶夜酣
當年何范聯花雪此日音聲隔水雲千里蘭言馨有腳殷勤遠

寄惜襟分

羊流店旅壁讀崔拙圃尙書過桃墟句卽次其韻

綠楊歸騎過桃墟又到羊公舊式閣讀罷壁閒紅杏句風流端屬老尙書

春郊行部夕陽西開府曾經駐馬蹄人面桃花皆往事一行楊柳綠成隄

謁嶽廟

使歸修謁禮驛騎暫時停廟踞山河勝神參造化靈魯齊尊保障秦漢表勳銘舉首瞻

宸翰雲煙

御墨馨

謁廟遇雨時正望澤喜而有作

嶽雲看起處霖雨應時來
野樹飛煙暝山城漲水隈
田疇多潤澤草木亦滋培

帝德真無外歡情面面開

漢柏

漢柏傳千古觀形識特鍾
結根依岱嶽挺幹比秦松

御筆圖貞操

御筆肖其形
寫圖鐫石立側

天恩篤老容年年滋雨露
長此載

堯封

壽新建曹大宗伯

世濟清芬重

廟堂端凝風度特康強時當首夏星辰燦位接三台日月光一

德交孚昭

盛治千秋衍澤拜

宸章

御賜秋宗衍澤額

滿城桃李羣稱祝

聖子

神孫亦舉觴

先生侍讀上書房

後先賢達仰嘉猷

帝眷欣承

錫命優燕許文章高北斗歐曾聲望重南州長生曲獻蓬萊客

延壽杯擎鸞鳳儔更喜華堂開宴日階前蘭玉樂油油

暮雨竟夜和竹井中堂韻

新秋氣候別涼暄竟夜瀟瀟雨入垣出水芙蓉香自遠因風鈴
鐸響偏繁煙凝繡野知無迹澤滿平疇料有痕曉看西山勻翠
黛稻花開徧水雲邨

題徐條甫祥草圖

似萱無葉綠莖
花六出輕紅色

同住城南尺五天奇花瑞草亦爭妍一枝新翠亭亭秀六瓣輕
紅特特鮮金掌露擎宿雨後玉堂人立曉風前園中真幹圖中
影佳氣相看正藹然

時予園中亦開
此花故並及之

丁酉九月奉使山東途中卽事

載承

恩命出都門又向皇華計
雨昏早識秋煙凝暮靄漸迎寒景上
朝暾往來不盡行人迹歲月頻增道路痕
莫訝使星今朗耀廿年前已沐

君恩

珍珠泉

一池清澈碧成漣萬顆珠生砌下泉荷蓋擎來秋露淨晶盤托
出夜光圓脉通滄海蛟人泣影落銀河列宿懸漫道老龍盤水
府時時噓氣沸如煎

訪錢籜石閣學畱坐四照樓卻賦一律卽呈籜石

時籜石
視學山

左樓在學使署
施愚山先生題

攜手同登四照樓湖山面面坐中收

大明湖在學署前

濟流起伏來千

里岱嶽崢嶸壓二州過眼煙雲憑去住到庭風月任句畱從知
學士多豪興把盞敲詩醉不休

擬登泰山用謝在杭登泰山韻二首

尋山著屐足消愁暢好登高趁九秋十八盤中瞻帝闕三天門
上望神州高連碧落雲生袂近接銀河月到樓應待夜闌看日
出振衣方是不虛遊

雲斂晴空疊嶂連丹林霜葉劇堪憐秦碑漢碣一時事日觀天
門萬古懸西挽黃河曾幾曲東銜滄海是何年放懷同得搜奇

勝未信人間有俗緣

春圃觀察出示其兄金沙相國畱別詩及和章次韻二首

一別銷魂日，翻嫌歲月忙。深情敦友愛，雅意示康強。

相國句我幸尙康強

轉側臨歧路，丁寧不越疆。難兄與難弟，兩兩重冠裳。

手足原相倚，分離兩意忙。弟恭兄本友，神健體方強。忍泣思同

被

觀察句五句猶共被

含情語接疆

相國有燕齊近接疆揮手莫沾裳之句

怡怡洵可樂感

我淚沾裳

余家世單傳

和李蘭皋觀察途中喜見麥苗青葱原韻

濟南東下不遲回，行過山隈又水隈。樹凝煙連紫塞，麥田貼翠勝新苔。雲盤綠朶三冬伏，浪疊銀花首夏開。獨有使君歡未

已又思積雪潤將來

題胡書巢太守養雲圖

茫茫東海水冉冉秦嶽雲兩兩遠相接一碧秋不分中來仙人
駕紫氣益氤氲粵西有胡子風高折角巾懷才富經術一麾守
海濱徜徉觀海嶽意氣日逸羣縹緲思滿貯養素是葆真

荅友人自嶧縣寄懷原韻

緬彼芝蘭芬同氣結良友別後餘渴悰晤時頻握手談笑無猜
嫌坐久轉牛斗雅重金石心薄彼雌黃口君年正黑頭我齒已
白首方喜得盤桓又折長亭柳此行非孟嘗客途無雞狗驛騎
催行程戀戀猶卻走我馬向齊東君節指齊右夕陽何處山邨

春耳邊白寄我花雪吟棣華同不朽雲龍願弗諧鶯鳴求素耦
顏色不可見新月偏照牖時初六日寒宵號朔風此境君同否

趨然臺歌

臺在諸城縣北城上

諸城城上舊有臺高壓城頭勢已摧大蘇增治記其事小蘇命
名賦崔嵬西觀縹緲說秦嶽東望蒼茫指蓬萊嵯峨馬耳山名列
翠嶂曲折扶淇水抱城隈川原北走曠無際俯瞰萬戶炊煙開
雲霞變幻憑旦暮四時風月自往來景物隨地皆可取一攬勝
概具化裁我因公畢得臨止縱目物外絕塵埃憑臨如登千仞
岡超然之境名實貶當日蘇公多豪興時攜賓客相追陪捫揣
電埽了公事興酣笑傲且銜杯蘇公去後七百載巍巍至今何

勿隕此城此地亦已久不傳何人畱一坏緣無浩瀚凌雲氣又
無倒峽挾天才縱使題築誇一時轉瞬淹沒同劫灰此臺藉公
足千古山高水長思悠哉

歷下亭

久聞歷下亭名古今識亭窗向水開恬靜湖光歸几席翠微山
色入追陪一城砧杵秋聲遠幾處蒹葭野岸隈莫道終宵人迹
少涵虛應有夜珠來

登匯波樓

濟南無北門樓在城上卽北城水
門樓也大明湖水由此出故名

城下匯波城上樓一湖清漾日悠悠望中春雨耕雲轉座底秋

濤帶月流

水出樓下城外
居民分以溉田

士女羣瞻千佛寺遊人誰問百花洲

志載百花洲在湖南最爲奇勝
今湮沒無可考且不知其名
茫茫秦岱連滄海不盡煙光紫

翠浮

望華不注

濟南城北路迢迢危石孤峯勢正驕拔地獨尊雄氣象仰天特
立秀丰標由來點染煙霞麗終古沾濡雨露饒直欲振衣凌絕
頂盪胸東望海門潮

喜雪

霏霏飄素散四野碧雲變茫茫一氣中遠山杳不見浙瀝占多
時紛糅遍幾縣瑤臺鶴夢驚微風入竹院霜淞聞齊歌

齊諺云
霜淞如

霧淞窮漢
備飯饑

冬積真可羨何處尋梅人六出花迎面

青州途次寄懷友人用前題養雲圖韻

雅意深寄託毫素裁朶雲開函多鄭重殷勤惜襟分齊魯隔千里暮煙日氛氲齊人尙節義魯國重儒巾嶧山遠不見淄濰近海濱徘徊望天際幾時重樂羣聚散復何常氣誼自有真

趵突泉和李蘭舉觀察韻

歸騎新從東海來名泉容我暫遲徊隱雷聲沸今還古噴雪淖

泓往復回池湧白雲牽水荇樓題黃鶴憶江梅

樓聯空山何處來黃鶴流水無

心響白雲乃呂仙降此所題

不須濟濶爭分辨地有真源巧自開

是泉有謂爲濟流伏

起者有謂爲岱陰特出爲濶源者名賢題詠各是其說要之總屬地脉所發不必紛紛聚訟也

丁酉冬日自山左事竣回京復奉

使河南次日出都口號

皇華仍問舊來程昨日今朝辨送迎

寵命頻承驚任重

簡書疊荷覺身輕曉乘驛路嘶風騎夜警郵亭擊柝聲最喜西

山新雪後冰心相映玉壺清

時雪後
初晴

孟縣渡河至偃師途中卽事

七年重到孟州路今日初行入偃師伊洛西來清在抱嵩高東
峙峻如斯河邊宿雁平沙遠山外斜陽落照遲卻喜麥田勻黛
色桔槔聲裏足培滋

到家卽事

歲歲鄉關別緒繁歸來今日若爲情到門賓客無前輩入座衣
冠半後生近水邨多修竹繞向陽樓對好山迎風光依舊年垂
老贏得人稱衣錦榮

省墓

一去家園十八年歸來今日涕潸然室廬彷彿猶環堵松柏依
稀認舊阡祇有歲時修望祭何緣伏臘奠黃泉祗徊不盡難留
處

聖主恩深北闕懸

丁酉夏恭遇

覃恩^堂以侍郎加二級自曾祖以下皆封一品適是冬奉

使歸德請假省墓仰蒙

天恩俞允得敬修焚黃之禮恭紀七言律詩四章

珥筆雲卿近

聖顏屢承

丹詔自天頒寵邀

使命慚無補

恩允陳情得暫還幾度皇華尋驛館一封

紫詔到鄉關遭逢深幸蒙

高厚清夜思維報稱艱

何緣奉

使攬驂駢載得

恩光到故扉望切松楸思莫禁感深霜露願無違題橋漫詔車

容壯上冢欣看春物非

時新正五日

六十年來雙盛事錦衣父子後

先歸

先大夫於康熙丁酉典試湖廣曾告假省墓堂請假亦值丁酉

親奉

絲綸日下來虔修牲醴告泉臺雲籠

鳳藻金花見日映

龍縑彩色開四世祖孫階一品

雨朝父子近三台

恩榮奕葉人爭羨風木餘思祇自哀

培蔭軒詩集

卷二

壹

七代傳家祇一身

集家至堂
七世單傳

常懷少壯不如人

仰承

聖德憐孤露竊幸庸才忝世臣三錫

鴻恩光甲第

堂已三遇
覃恩矣

五花

鳳誥壽貞珉九泉靈爽知無憾存沒均沾

雨露仁

畱別諸親友兼以述懷

廿年幾度悅親情別緒難禁此後縈不盡逢人傾盡語那堪回首踏歌聲無聞竟爾輪先達可畏居然羨後生兩字率真差自信恥談機巧怕非誠

由來唯別最銷魂況是離家去里門祠墓春秋時繫念族親寒
暑日難論漫勞車馬途中客遮莫雲山雨外邨未敢遲遲多信
宿祇緣家世沐

天恩

過廣平梅花亭謁朱文貞公祠恭和

御製原韻

賦梅聊自況餘韻至今畱

御筆風標古

天章景色幽旌賢昭

聖德表里紀

宸遊亭畔圖疎影

御寫古梅一本勒石嵌壁

階前匯碧流品超貞幹上人

結素心儔

睿藻褒忠亮

御製有忠亮世稀儔之句

君臣異代投

過邯鄲訪盧生祠和魏環溪先生韻

往來車馬總云醒誰識黃梁爨未成終日紛紛終日夢翻然一覺是盧生

石像頻年臥未醒非因好夢尙無成仙家化去坏胎在畱此坏胎悟眾生

畢竟人人盡解醒古今名教有何成細推指點機關處弗用機關是悟生

哲士早知身未醒癡人偏說夢難成仙家妙解明醒夢說到虛無也寄生

紛紛原是夢無醒事業都從夢裏成待得覺時方了悟憑誰相與話平生

淇縣晤朱介山話舊

故人久不見何緣會一朝聞我來

北闕不辭遠出郊相會在淇水有斐見風標握手無寒暄但言別路遙回首望白雲憶昔共西曹芝蘭結同氣惟淡爲至交退食時過從相敬無笑嘲嗣我歷秦晉君屢乘星輅一麾守衛地旋復秉朱旄三畏君子心四知賢者操慈愛比名杜巡行徧衡

茅溢水困邨民振溺出洪濤感君活命恩壺漿遮前鑣至今閭
里聞共頌使君勞三代直道在民風原不澆民吾本一體此語
等粕糟君獨推誠信念彼若同胞上廣

天子仁下起萬民謠布澤匪邀譽蒼生自見招願言須努力前
路正迢迢

歸至良鄉星橋冒雪來迎喜而有作

去冬此地勞相接今到良鄉又見迎兩月懷思入遠夢一般風

雪坐寒更

去冬是日亦大雪

同舟吳下當時事竝轡燕南此日情踏碎

瓊瑤歸

帝里

恩光共仰鳳凰城

戊戌冬夜出京過盧溝橋

朝雪初晴夕照收
又乘星騎過盧溝
河聲依約藏冰底
山色晶瑩映馬頭
曉月未看昇冉冉
殘燈猶見夜悠悠
揮鞭此去前程遠
譙鼓頻聽幾處樓

旅館中見壁間大幅山水疊巘層雲頗具幽致不畫一人
因題二絕

丹林秋葉夾長松
瀑布千尋響石淙
流水小橋人迹少
好山多被白雲封

千疊雲山幾曲流
霜花點染一林秋
丹青眼底無人物
祇寫煙

風景色幽

望嵩

渡洛瞻嵩嶽連天積翠重誦詩欽峻極觀體識雄封險說輟轅
道高推紫蓋峯何時探三室尋勝訪仙踪

再入偃師壘前韻

去年初過嵩陰路今日重行到偃師嶽色崔嵬仍若此河聲澎
湃鎮如斯邑治背即外即黃河依然隴畝緣邨翠終古川流帶月遲莫把
殘冬低放眼春來高下總華滋

偃師館寓二程書院院後臺祀二程先生謁而有作

先儒禋祀地展拜客途中伊洛源流遠金昆道德崇未能立夜

雪偏得坐春風

時冬至後天氣晴和登臺向日
暖若三春惟望冬雪滋麥耳

此是程門路羣

言好折衷

過長葛晤管遵峯廣文

洛陽花雪竟如何誰道星軺此地過手把故人思往事飛旗山

下別情多

飛旗山近遵峯里居余
庚辰過其地一別至今

十八年前共壯遊別來心事日悠悠相逢漫道頻相憶相看今

歎兩白頭

寄懷顧星橋中翰時星橋丁艱歸里

暮雲平遠望江東往事都歸記憶中馳馬吳門吟夜月驚颿燕
市嘯春風三千里路形聲隔八載居停臭味同爲問別來今若

似好將消息託鱗鴻

過鄆陵懷荆星海茂才

邨邨翠繞麥層層城郭依然歲月增記得元宵風雪後曾同車
馬到鄆陵

食油菜喜而有作

一盤青嫩薦園蔬飽啖欣然意自如寧可停驂居有竹何妨供
饌食無魚鄉關客至能添箸都下人誰解設菹不是充腸厭梁
肉此中滋味要頻咀

寓相國寺過方丈晤充公和尚出朝山圖索題卽次所作

菩薩頂韻

清涼臺畔擁雲霞山色泉聲處處嘉示相莊嚴覩伏座傳鐙明
續鳥銜花膽奇心定終成悟味道行堅未有涯獨我無緣登絕

頂

余任山西冀寧道擬一謁五臺登高頂旋以陞任去甘未果

偷閒且吃趙州茶

同喀靜庵少寇遊相國寺西園次學使王露仲侍讀題朝

山圖韻

奉

使來汴梁星軺飛轉轂停驂相國中古寺數經宿偷暇瞻妙相
結伴訪遺躅非色亦非空不礙閒雲觸繞廊盡莊嚴羅漢具法
服森森天王神警彼水四瀆僧徒勤梵唄禪牀夜漏促中有大
釋子來向方丈速相與問訊閒道說素知僕貌古神亦清能詩

頗免俗禪心息機關
馴彼放生鹿行行到禪房
幽徑通幾曲生意滿目前
繞堂種花木示我朝山圖
雲水千里複披圖見別裁
名勝詩可續往返越長城
經時道塗熟不辭歷艱辛
禮佛參金粟戒行苦精誠
跋涉消髀肉內典我未聞
談論似不屬所喜清淨心
無爭無恥辱不二法門中
要亦貴知足茶罷涉西園
緩步少羈束相對一池清
悠然想濠濮石徑雲磴穿
度橋出平陸登彼妙香閣
歷歷列品目高樓藏藏經
大眾問誰讀徘徊四望中
此地成遐矚嵩陽古柏畱
淇園久無竹余新從洪輩來回首閱圖冊
題詩已滿幅就中有長歌
氣味餘清馥

內黃過陳少尹四舅翁衙齋

乘車從南來渡河風不逆載道星夜馳幾度越古驛停輿謁舅
氏閒曹門徑闥入門見堂廡環堵餘四壁坐久多寒暄聊以慰
岑寂黯然一年中何復成良覲回首憶故園因之話往昔往昔
吾邑中風景頗清適負郭田膏腴環邑山水碧結廬竹木華邨
居盡幽僻男耕餘倉糧女織饒布帛池塘鮮可烹雞黍足供客
尤喜俗淳龐從忠薄盡革言動鄙輕儇交重松與柏共成敦厚
風機械眾所責初春我假歸暫得悅親戚悲謝老成人後生盡
英辟少壯意氣雄侈談風流劇瞻彼春日燕飛飛過駒隙又見
秋日雲輕輕度朝夕人生有秉彝何便成陷溺習巧噍拙成安
知守分益舅氏聞子言相與深惋惜

奉

使龍潭祈雨用壁間韻

馳車到此便停驂寺外松枝葉翦藍危石高懸傳虎穴清泉深
貯認龍潭峯迴無礙流雲湧水瀉惟餘瀑布酣稽首一犁農事
足不貪空翠說山嵐

龍潭喜雨用戚繼光韻

蟠踪養性幾經春爲雨爲霖動

聖人靈蹟舊知千里潤神功今見一番新滋培庶物來青甸長
養羣生達

紫宸莫謂無慚

天子使逢人都是太平身

題扇頭折枝雜卉

休誇穠豔鬧春陽
漫說殷勤護淡粧
最喜暑窗開便面
載來清影一齊芳

錦江春色漫相催
披拂和風取次來
不惹游蜂與狂蝶
暗香浮處月華開

蓬島祥光泛彩霞
瑤池清露帶芳華
珠簾十二樓臺靜
畫永風微映碧紗

冰桃雪藕恰相宜
水閣炎天日午時
一握清風來滿座
草香花氣自維持

誰把繁枝簇錦團四時風韻未闌珊霓裳舞後歌新月幾度句
人掌上看

臥牛硯銘

士讀農耕農不可以執筆士不可以執鞭胡爲乎此物臥於書
案之間士賴農以養農待士以治窮經致用亦須知稼穡之艱
難相伴相觀不僅貴於磨穿

御賜福字

由來景福自天申

錫命初承

御墨新雲護彩毫光紉熉香縈寶篆氣停勻

九天澤普無疆頌四海恩同有腳春
載得鴻庥歸邸第滿門嘉慶仰

皇仁

出關日荅少京兆劉乙齋送別原韻

論交已是廿年欽兩度重逢意倍深
敢詔金蘭同臭味願將秋月共冰心
鳳坡人士雲霞蔚棘院風光夜漏沈
今日至公堂上別他時相遇好相吟

培蔭軒詩集卷二

男麟校刊

孫仁益正字